

國朝耆獻類徵初編卷首之六十二

通奉大夫前署江西巡撫江西布政使司布政使臣李桓恭錄

欽定外藩蒙古回部王公表傳卷之五十

傳第三十四

扎薩克固山貝子錫布推哈坦巴圖爾列傳

今襲一等台吉

錫布推哈坦巴圖爾喀爾喀部人姓博爾濟吉特土謝圖汗察琿多爾濟從弟祖錫布固泰號鄂爾齋圖琿台吉幹齊賴賽因汗阿巴岱之長子也妻車臣哈屯生子二長穆車號烏巴什琿台吉卽錫布推哈坦巴圖爾父次鄂爾果岱諾木齊生達什號琿台吉子車凌扎布授扎薩克台吉別有傳初錫布推哈坦巴圖爾與弟青

多爾濟納木扎勒陀音諾爾布額爾克等駐牧巴顏烏蘭常擊走俄羅斯掠境兵康熙二十七年噶勒丹由杭愛山肆掠錫布推哈坦巴圖爾逆擊之有和託輝特二台吉誓同拒噶勒丹旣而背盟錫布推哈坦巴圖爾拘之會噶勒丹遣人誘降錫布推哈坦巴圖爾怒執其使避走克嚕倫河三十年侍郎瓦岱奉

命赴圖拉河偵噶勒丹路由克嚕倫錫布推哈坦巴圖爾率諸弟迎會瓦岱來歸

上嘉之

諭曰爾錫布推哈坦巴圖爾於土謝圖汗察琿多爾濟爲兄弟行職貢有年當噶勒丹誘爾降時獨知大義雖敗不降今隨大軍慕

化歸誠朕甚嘉悅特封爾爲扎薩克輔國公爾其勛之是年仍歸
巴顏烏蘭游牧尋徙圖拉河

上以其地爲噶勒丹往來所必經

諭嚴防禦三十四年八月噶勒丹貽書納木扎勒陀音誘往會納
木扎勒陀音拒之隨錫布推哈坦巴圖爾走陰山北

詔亟徙歸化城界所屬戀故土弗肯徙噶勒丹猝至復被掠十月
納木扎勒陀音自縛請罪

詔宥之尋徙色楞額河三十五年

上親征噶勒丹至克魯倫察噶勒丹必遁

赦錫布推哈坦巴圖爾躡擊之三十八年敘追擒巴爾呼逃眾功

晉固山貝子四十三年卒子二長巴海封扎薩克輔國公別有傳
次車布登降襲鎮國公

一次襲車布登錫布推哈坦巴圖爾次子康熙四十五年襲扎薩
克鎮國公五十六年隨大軍由阿爾臺擒斬特楞古特賊眾雍正
元年以居察哈爾之厄魯特降人羅卜藏錫喇布等叛逃偕同部
輔國公車木楚克納木扎勒追緝之射斃賊眾阿玉什額博壘等
敘功以其父原爵貝子

詔晉多羅貝勒九年大軍勦噶勒丹策凌車布登奏敗賊於蘇克
阿勒達呼

賜阿克敦巴圖魯號并

賜三眼孔雀翎及黃帶十年額爾德尼昭之役復以追敗賊眾
聞晉封多羅郡王十一年追議其勦賊不力偕同部親王丹津多
爾濟飾奏冒功罪

諭曰車布登初襲公爵因追勦羅卜藏錫喇布著有勞績恩擢貝
勒嗣與丹津多爾濟飾奏蘇克阿勒達呼及額爾德尼昭擊賊功
妄邀封賞今實情畢露知其率一千兵遇賊百餘輒畏懼不前虛
張聲勢令賊遠遁及偕副都統塔爾岱率兵追賊誑令迷路縱賊
遠颺並無爲國效力實心著削郡王爵及賜號撤還黃帶降授貝
勒飭赴科布多軍營效力贖罪儻仍舊退縮瞻顧定從重治罪乾
隆元年

命署所部副將軍駐防烏里雅蘇臺定例駐防副將軍及期而代
是年冬車布登不候代擅歸游牧爲額駙策楞所劾

敕責其罪六年參贊大臣都統塔爾瑪善奉

命赴烏克圖濟爾哈朗閱防秋兵以車布登旗軍容整肅

獎賚之十九年三月以收撫烏梁海

諭偕同部郡王桑齋多爾濟等赴鄂爾海喀喇烏蘇駐防尋偕參
贊大臣安崇阿德甯等移駐庫克嶺七月新降杜爾伯特台吉車
凌蒙克子巴朗攜眾由庫克嶺叛逃車布登以追捕弗及奏

諭曰車布登與安崇阿德甯同駐庫克嶺專爲防範逃眾乃巴朗
從此脫逃伊等率兵尾追並不奮勇前進卽行退歸安崇阿德甯

二人著卽正典刑車布登削貝勒爵降授貝子仍畱軍營效力贖
罪二十年定北將軍班第由北路進剿達瓦齊於伊犁道出阿爾
台以烏梁海眾潛附準噶爾遣車布登沿途剿捕至固爾班鼐塔
克及烏蘭布拉克喀喇哈巴地遇烏梁海副都統察達克屬得木
齊綽罕宰桑圖布慎屬得木齊喀喇曼濟等眾盡降之並獲巴朗
從賊二百餘戶伊犁平師旋車布登偕副都統敦多卜率兵三百
由薩噶勒巴什嶺往收汗烏梁海汗卽烏梁海所居地也宰桑郭
爾卓輝鄂木布及布魯古特宰桑根都什特楞古特宰桑瓜齊楞
皆率眾降會阿睦爾撒納叛賊黨克什木等擾伊犁車布登齎
救往

國朝典章
卷之六十一
諭準噶爾眾敘功

詔復多羅貝勒二十一年和託輝特逆賊青衮咱卜叛車布登將以兵會參贊大臣塔爾瑪善赴烏蘭嶺追剿阿睦爾撒納未至遽由納林喀喇歸牧塔爾瑪善以

聞

諭曰車布登係喀爾喀舊人受恩最爲深重今乃擅棄職守私行逃歸情甚可惡著擒解來京治罪是年冬定邊左副將軍親王成衮扎布以車布登擅歸游牧復詭病不從剿青衮咱卜請削爵論死

詔削貝勒宥死子齊旺多爾濟降襲輔國公

二次襲齊旺多爾濟車布登長子乾隆十六年

命乾清門行走

賜孔雀翎及黃馬褂二十一年襲扎薩克輔國公二十三年二月所屬歉收

命賑之八月車布登來朝

諭曰原封貝勒車布登係附和逆賊青衮咱卜之人原應按例治罪朕因其平日爲人愚昧又年老可矜從寬祇令削爵仍許其子承襲輔國公伊悔罪感恩抒誠入覲念前此曾經宣力積有勤勞著加恩賜公品級遣歸游牧二十四年齊旺多爾濟擒自喀喇木蘭叛逃之厄魯特丹巴等

諭獎之

賜雙眼孔雀翎三十年卒仍令其父車布登襲

三次襲車布登乾隆三十年仍襲扎薩克輔國公三十五年卒孫齊素隴多爾濟降襲扎薩克一等台吉

四次襲齊素隴多爾濟車布登次子台吉齊旺之子乾隆三十五年襲扎薩克一等台吉四十一年扈

駕木蘭行圍

賜孔雀翎四十六年

詔世襲罔替

扎薩克輔國公車凌巴勒列傳

車凌巴勒喀爾喀部人姓博爾濟吉特土謝圖汗察琿多爾濟第四子初授一等台吉康熙三十年隨父來朝

賜冠帶銀幣五十年

駕幸避暑山莊車凌巴勒來朝

上追念其父察琿多爾濟來歸之誠又以車凌巴勒年老猶爲台吉

詔封扎薩克輔國公析其從子扎薩克台吉班珠爾多爾濟五佐領隸之五十四年偕子巴木丕勒多爾濟隨大軍駐防扎布堪五十六年移駐哲爾格西喇呼魯蘇五十八年隨右衛將軍費揚古

籌築扎克拜達哩克城六十一年

命率兵由汗阿林移厄魯特降人羅卜藏錫喇布游牧於察哈爾
雍正六年卒子巴木丕勒多爾濟襲

一次襲巴木丕勒多爾濟車凌巴勒長子康熙五十六年隨額駙
巴林郡王烏爾袞由阿爾臺進剿準噶爾於赫色勒巴斯諾爾雍
正七年襲扎薩克輔國公

命督所部備用軍駝八年由額爾德尼昭運屯田穀實於塔本託
羅海尋以築科布多城解所用鐵九年隨同部親王丹津多爾濟
等剿準噶爾賊酋大策凌敦多卜於蘇克阿勒達呼十年復隨額
駙策楞敗小策凌敦多卜於額爾德尼昭乾隆十二年卒子車登

三丕勒襲

二次襲車登三丕勒巴木丕勒多爾濟次子乾隆十三年襲扎薩克輔國公十九年二月隨參贊大臣薩拉爾擒擅入汛界之烏梁海人博羅特瑚圖克等

諭嘉之二十年四月

命隨定北將軍班第由北路勦達瓦齊六月偵烏什阿奇木伯克崔集斯擒獻達瓦齊偕副都統額爾登額以兵五百由穆色爾嶺往取械達瓦齊詣軍七月班師率喀爾喀五百扎哈沁三百索倫二百兵還二十一年隨定邊左副將軍哈達哈進兵哈薩克路遇固爾班和卓等攜千餘戶遁烏梁海車登三丕勒追擒有功

國朝文獻類傳卷之三
賜孔雀翎二十二年駐防翁固爾諾爾有台吉達瑪琳者其族也
附和託輝特逆賊青衮咱卜叛副將軍親王桑齋多爾濟奉

詔往擒未至達瑪琳遁車登三丕勒偕協理台吉占楚卜由翁固
爾諾爾馳追縛以獻

獎資幣二十八年赴恰克圖駐防四十一年卒子拉素隴多爾濟
襲

三次襲拉素隴多爾濟車登三丕勒長子乾隆三十七年扈

駕木蘭行圍

賜孔雀翎四十一年襲扎薩克輔國公四十三年督理烏里雅蘇
臺軍營學舍四十六年理藩院議拉素隴多爾濟所襲輔國公係

恩封出缺時請降襲

諭曰拉素隴多爾濟之曾祖車凌巴勒蒙

聖祖仁皇帝格外鴻慈特封公爵承襲有年朕於車凌巴勒子巴
木丕勒多爾濟出缺時不忍削去是以仍令其子車登三丕勒及
孫拉素隴多爾濟相繼承襲今若照議降襲朕心殊爲不忍著加
恩世襲罔替

（The main body of the page contains multiple vertical columns of text, which are mostly illegible due to fading and blurring. The text appears to be organized in a structured format, possibly a table or a list of entries, with approximately 10-12 columns visible. The characters are small and difficult to discern, but they follow a traditional vertical reading pattern from right to left.)